

3) Opšti uslovi poslovanja sa računima i paketima (v.1.2)

Uvodne odredbe: Ove odredbe se primjenjuju u poslovanju sa računima i debitnim platnim karticama vezanim za račune. Ovim Opštim uslovima poslovanja sa računima i paketima se utvrđuje minimum uslova pod kojim Banka odobrava korištenje platnih kartica u poslovanju sa fizičkim licima kao korisnicima.

Korisnik je svako fizičko lice koje stupa u poslovni odnos sa Bankom radi korištenja bankarskih usluga, a koje nisu namjenjene njegovoj poslovnoj ili drugoj komercijalnoj djelatnosti.

Račun (transakcioni i devizni račun) klijent može ugovoriti u domaćoj i stranoj valuti za primanje redovnih mjesečnih primanja i /ili neredovnih primanja, te obavljanje platnih transakcija u zemlji i inostranstvu.

Paket računa je skup bankarskih i nebankarskih proizvoda za čije korištenje vlasnik plaća jedinstvenu naknadu.

Kartična organizacija je Visa International i/ili MasterCard International.

Platna kartica je pravo kojim Banka ovlašćuje Korisnika da putem kartične plastike raspolože sredstvima na računu u Bosni i Hercegovini i inostranstvu, na način pod uslovima koji se definišu ugovorom.

Kartična plastika je sredstvo kojim se realizira pravo iz platne kartice, koju Banka izrađuje u skladu sa standardima kartičnih organizacija i ista je vlasništvo Banke. Kartična plastika se izdaje na određeni rok koji se navodi na kartičnoj plastici.

Period važenja kartične plastike utisnut je na samoj plastici i važi do posljednjeg kalendarskog dana u mjesecu označenom na kartici. Ukoliko Korisnik ne želi da mu se platna kartica ponovo izda, dužan je o tome, pisanim putem obavijestiti Banku, najmanje 60 dana prije isteka roka važenja kartice. U tom slučaju Korisnik se obavezuje da izmiri sve obaveze nastale korištenjem kartice.

Platne transakcije su transakcije plaćanja roba i usluga i podizanje gotovine.

Debitna kartica je platna kartica koja je povezana sa platnim računom korisnika. Izdatom debitnom platnom karticom korisnik može plaćati robu i usluge i/ili podizati gotov novac na bankomatima i šalterima banke do visine iznosa sredstava koje ima na računu, koji može da uključuje i dozvoljeno prekoračenje.

Limit je maksimalno dozvoljeno prekoračenje koji Banka odobri po kartičnom računu. Kod debitne kartice limit se odobrava na period od 6 (šest) mjeseci, računajući od dana zaključivanja ugovora, sa automatskim obnavljanjem na daljnjih šest mjeseci, ukoliko su na dan obnavljanja ispunjeni kumulativno sljedeći uslovi:

- ukoliko je korisnik računa primio preko računa otvorenog u Banci najmanje jedno redovno mjesečno primanje u posljednja 3 mjeseca ili ukoliko je korisnik računa uplatio minimalno jednu uplatu u posljednja 3 mjeseca;
- ukoliko je račun u pozitivnom saldu ili dozvoljenom prekoračenju (uz jedan od prethodna dva uslova za uplatu) pri čemu se toleriše nedozvoljeno prekoračenje do maksimalno 70,00 KM
- da je u posljednjih 12 mjeseci koristio bar jedan dan prekoračenje.

Prilikom obnavljanja perioda važenja kartice nakon njenog isteka, Banka može smanjiti iznos limita u slučajevima pogoršanja kreditne sposobnosti Korisnika, te ukoliko je Korisnik u prethodnom periodu važenja vršio povlačenja sredstava u ukupnom iznosu od 50% ili manje od odobrenog limita.

Za klijente sa ugovorom o radu na određeno vrijeme može se odobriti dozvoljeno prekoračenje bez automatske obnove sa rokom trajanja limita minimalno dva mjeseca kraćim od roka isteka ugovora o radu, a najduže 6 mjeseci.

PIN - tajni lični identifikacioni broj Korisnika kartice koji služi za identifikaciju krajnjeg Korisnika na bankomatu ili POS-u.

Dodatni korisnici su lica određena od strane osnovnog Korisnika koja mogu koristiti platnu karticu. Na zahtjev Korisnika mogu se izdati najviše 2 (dvije) dodatne kartice. Korisnik odgovara za svaku dodatnu i snosi sve troškove nastale korištenjem dodatnih kartica. Svaka izdana kartica (osnovna ili dodatna) glasi na ime i nije prenosiva.

Kamate: Za obračun kamata po platnim karticama, računima i prekoračenju primjenjuje se fiksna nominalna kamatna stopa određena važećim tarifnikom Banke. Obračun kamate se vrši na

dnevnom nivou i pripisuje mjesečno saldu računa. Metod obračuna kamate je prosti tj. proporcionalni metod.

U slučaju kašnjenja obračunava se i naplaćuje zatezna kamata u visini zakonske zatezne kamate.

Izvjestaji po kartičnom računu: Banka jedanput mjesečno, na kraju svakog obračunskog perioda, bez naknade, putem izvoda, dostavlja izvještaj elektronskim putem na adresu koju je odredio Korisnik, a u nedostatku elektronske adrese Korisnik izvod može preuzeti u poslovnici Banke.

Banka dostavlja Korisniku Izvod o ostvarenim transakcijama učinjenim osnovnom i dodatnim karticama u prethodnom mjesecu, obavezama koje su nastale njenim korištenjem i o datumu kada će tekući račun Korisnika kartice biti zadužen za iznos preostalog duga.

Izvjestaj o naknadama: Banka će Korisniku, bez naknade, učiniti dostupnim izvještaj o svim naknadama za usluge povezane sa platnim računom, u najbližoj poslovnici Banke, najmanje jednom godišnje ili po njegovom zahtjevu. Izuzetno, ukoliko Banka i Korisnik tako dogovore Banka može dostaviti izvještaj iz ovog stava putem elektronske pošte na adresu koju je odredio Korisnik. Banka je dužna da izvještaj o naknadama iz ovog stava, na izričit zahtjev Korisnika, učini dostupnim u pisanoj formi na gore definisani način.

Blokada kartice: Banka može blokirati karticu (osnovnu i dodatne), bez prethodnog obavještenja Korisnika ukoliko se kartice koriste protivno odredbama ugovora ili nisu osigurana sredstva za izmirivanje obaveza nastalih korištenjem kartica.

Rizik dostavljanja kartica i ličnog identifikacionog broja (PIN): Banka snosi rizik u vezi dostavljanja kartica i PIN-a, a nakon prijema istih rizik preuzima Korisnik.

Osiguranje: Korisnik može biti i Korisnik osiguranja od rizika zavisno od vrste proizvoda za koji se Korisnik odluči koristiti. Osiguranje obuhvata osiguranje od rizika u skladu sa osiguravajućim pokrićima navedenim u polisi i certifikatu osiguranja. Polise osiguranja su cijelo vrijeme trajanja ugovornog odnosa vinkulirane u korist Banke.

Reklamacije: U roku od 30 dana od datuma izdanog izvoda isti se može reklamirati putem obrasca za reklamacije koji Korisnik može preuzeti i predati u najbližoj poslovnici. Banka ne snosi odgovornost za štete nastale upotrebom kartice, koje nastaju kao rezultat okolnosti na koje Banka nije i ne može uticati, kao što je odbijanje ili neispravno izvršavanje autorizacije uslijed greške u sistemu obrade pri centru za autorizaciju ili telekomunikacijskih linija, nestanak električne energije, kvara bankomata itd. Banka ne snosi odgovornost ukoliko trgovac iz bilo kojih razloga nije htio da prihvati karticu. Banka ne odgovara za eventualne sporove povodom kvalitativnih i kvantitativnih nedostataka robe i usluga plaćenih karticom. Reklamacija troška plaćenog karticom ne oslobađa Korisnika od obaveze plaćanja tog troška, ali Korisnik ima pravo na povrat ukoliko se ustanovi da je reklamacija bila opravdana. Izvršena ispravka će biti vidljiva na sljedećem Izvodu. U slučaju neopravdanosti reklamacije Banka će dati obrazloženje i navesti razloge odbijanja reklamacije.

Sigurno korišćenje platnih kartica: Radi sigurnog korištenja kartice Korisnik je dužan pridržavati se ovih pravila: Čuvati karticu i držati je u vidokrugu pri svakom obavljanju transakcije; Ne davati broj na kartici drugim licima; Ne dopustiti drugim licima da koristi karticu i PIN; Ne zapisivati PIN, a obavijest o PIN-u uništiti; Pri unosu PIN-a stati blizu bankomata i zaštititi rukom tipkovnicu; Ukoliko se uoči nešto sumnjivo na samom bankomatu (dodatno instaliranu opremu, sumnjivo ponašanje osoba u blizini) ne koristiti taj bankomat; Ukoliko bankomat ne vrati karticu, odmah Banci prijaviti gubitak kartice; Potvrdu o transakciji čuvati za vlastitu evidenciju, a prije bacanja pocijepati je da ne bude čitljiva; Pregledati mjesečni izvod; U slučaju elektronske trgovine tražiti od prodajnog mjesta da potvrdi cjelokupni iznos transakcije koji će teretiti karticu, uključujući dodatne naknade, poštarine i sl; Osigurati da elektronski uređaj Korisnika ima instaliran najnoviji antivirusni software; Kupovati na poznatim i sigurnim web stranicama; Ignorirati e-mail poruke u kojima se traže lični podaci, šifre, PIN i sl; Uvijek

isprintati svoju narudžbu, uslove kupovine/povrata robe/ispоруke, te adresu i telefonski broj prodajnog mjesta.

Način postupanja i odgovornost u slučaju neovlaštenog korišćenja podataka sa platne kartice, krađe ili gubitka kartice: Ukoliko je kartica ili dodatna kartica izgubljene, ukradena, oštećena ili je neovlašćena osoba saznala PIN ili broj kartice, Korisnik je dužan o tome odmah obavijestiti Banku na telefon +387(0)51 951 000, koji su dostupni 24 sata svakog dana. Banka će bez odlaganja izvršiti blokadu kartice. Usmenu prijavu Korisnik treba u najkraćem roku potvrditi i pismenom izjavom, uz koju će dostaviti i potrebnu dokumentaciju. Do momenta prijave Banka ne snosi odgovornost za neovlašćeno korišćenje kartice, a nakon prijave Banka je odgovorna samo za iznose koji su utrošeni preko uređaja koji zahtjevaju elektronsku autorizaciju. Ukoliko Korisnik nakon prijave pronađe karticu više je ne smije koristiti, već će je vratiti Banci. Po prijemu pisane izjave o gubitku ili krađi kartice Banka će Korisniku izdati novu karticu, čiji trošak izdavanja snosi Korisnik. Prijavu ukradene kartice Korisnik je dužan prijaviti i policijskoj stanici.

Pravo na odustanak od ugovora: Banka ne može korisniku staviti na raspolaganje kreditna sredstva prije isteka od dana zaključenja ugovora, izuzev na izričit zahtjev Korisnika.

Korisnik ima pravo odustati od ovog ugovora u roku 14 dana od zaključenja ugovora, bez navođenja razloga za odustanak, pod uslovom da nije počeo koristiti kredit, dostavljanjem pismenog obavješćenja Banci. Dan prijema ovog obavješćenja se smatra danom odustanka. Korisnik je u tom slučaju dužan platiti Banci naknadu za odobravanje kredita.

U ovom slučaju Korisnika ne obavezuju sporedni ugovori, osim ako je počeo koristiti predmetnu uslugu. U zahtjevu za odustanak mora izričito biti navedeno i odustajanje od sporedne usluge. U ovom slučaju Banka ima pravo na naplatu obračunate naknade za pristup i korišćenje Paketa kao i druge naknade za proizvode i usluge iz Paketa, koje su stvarni trošak Banke.

Važenje ugovora: Ugovori o korišćenju paketa proizvoda i usluga zaključuju se na neodređeno vrijeme, a platne kartice kao posebni proizvodi ili kao proizvodi unutar paketa vrijede u periodu važenja kako je navedeno uz svaku platnu karticu, sa mogućnošću automatskog produženja.

- a) **Pravo na raskid/otkaz ugovora:** Ugovor o računima Korisnik može otkazati ugovor bez obaveze obrazloženja istog, uz otkazni rok od 8 dana, u kojem slučaju je svaka strana dužna ispuniti sve do tada nastale obaveze. Banka može otkazati ugovor o računu, bez obaveze obrazloženja istog, uz otkazni rok od 60 dana, u kojem slučaju je svaka strana dužna ispuniti sve do tada nastale obaveze
- b) Svaka ugovorna strana može otkazati ugovor o paketu bez obaveze obrazloženja istog, uz otkazni rok od 30 dana. Raskid se vrši u pisanoj formi. U slučaju raskida od strane Korisnika, po isteku otkaznog roka od 30 dana Korisnik neće moći koristiti usluge koje su sastavni dio paketa, te istovremeno dospijevaju sve obaveze za plaćanje, kao i obaveza vraćanja Banci svih izdatih platnih kartica, token-a, ukoliko su izdati Korisniku. U slučaju raskida ugovora od strane Banke, po isteku otkaznog roka od 30 dana Korisnik neće moći koristiti usluge koje su sastavni dio paketa, dospijevaju sve obaveze za plaćanje, kao i obaveza vraćanja Banci svih izdatih platnih kartica, token-a, ukoliko su izdati Korisniku, s tim da će račun Korisnika biti zatvoren nakon isteka roka od 60 dana u skladu sa prethodnom tačkom.

Banka može, trajno ili privremeno, uskratiti pravo korišćenja pojedinog bankarskog proizvoda koji je sadržan u paketu, kao i uskratiti pravo korišćenja paketa ili otkazati ugovor u slučaju ako Korisnik paketa ne izvrši ili kasni s izvršenjem plaćanja novčane ili bilo koje druge obaveze.

Banka može onemogućiti raspolaganje računom i korišćenje usluga vezanih za račun, odnosno otkazati ugovor Korisnika kojem je isteklo važenje ličnog identifikacionog dokumenta koji je prezentovan Banci prilikom zasnivanja ugovornog odnosa ili u toku njegovog trajanja, ukoliko Korisnik ne dostavi Banci novi važeći identifikacioni dokument u roku od 30 dana od slanja poziva Banke.

Banka će poziv za dostavljanje kopije važećeg dokumenta iz prethodnog stava, uputiti Korisniku na poslednju poznatu adresu koju je Korisnik dostavio Banci, odnosno putem elektronske pošte ili sms usluge ukoliko Korisnik koristi takvu vrstu komunikacije sa Bankom, čime se dostavljanje poziva smatra izvršenim.

Posljedice neizmirenja obaveza: Svako ponašanje Korisnika suprotno od ugovorenog predstavlja kršenje Ugovora i ovlašćuje Banku da jednostrano, pisanim putem, raskine ugovor bez primjene otkaznog roka, što za posledicu ima dospelje svih obaveza za plaćanje odmah, pri čemu dospjele obaveze čine iznos svih nenaplaćenih glavnica i naknada kojim se pripisuju ugovorene kamate, a iskazuju se kao jedinstven dug na koji Banka može zahtjevati zakonsku zateznu kamatu od dana utuženja pa do konačne isplate, uvećano za troškove postupka. Banka može u postupku naplate svojih potraživanja angažovati treća lica što za posledicu ima i dodatne troškove postupka za Korisnika.

Neaktivni računi: Neaktivnim računom smatra se račun na kojem nije bilo aktivnosti deponovanja ili povlačenja sredstava sa računa, urađenih ili zadanih od strane Korisnika, zakonskog zastupnika i druge ovlaštene osobe u periodu od 12 mjeseci od dana zadnje aktivnosti, odnosno 12 mjeseci nakon isteka ugovorenog roka ili ugovorenog odnosa. Neaktivni račun se ponovo aktivira radnjom Korisnika koje imaju za posledicu deponovanje ili povlačenje sredstava sa računa. Banka će izvršiti ponovnu provjeru identiteta Korisnika u slučaju aktiviranja računa, a Korisnik je dužan priložiti potrebnu dokumentaciju kao da otvara račun u skladu sa standardima sprječavanja pranja novca i finansiranja terorističkih aktivnosti. Banka ne obračunava kamatu na neaktivne račune, te naplaćuje mjesečnu naknadu za održavanje neaktivnih računa.

Izuzetnog od prethodnog stava ugovor o osnovnom platnom računu Banka može zatvoriti ukoliko na osnovnom platnom računu fizičkog lica nije izvršena nijedna platna transakcija duže od 24 uzastopna mjeseca.

Stavljanjem računa u status neaktivni klijent neće imati prava korištenja drugih usluga koje su vezane za račun, npr. usluga sms.

Banka će vršiti zatvaranje neaktivnih računa sa stanjem na računu u iznosu manje ili jednako +20,00KM/-20,00 KM minimalno jednom godišnje. Ukoliko vlasnik računa naknadno traži isplatu sredstva koje je imao na računu Banka će isplatiti ista sredstva na račun klijenta u Banci.

Banka može izvršiti zatvaranje neaktivnih računa sa stanjem na računu u iznosu većem od +20,00KM/-20,00 KM u skladu sa posebnom odlukom Banke, o čemu će obavjestiti Korisnika na posljednju poznatu adresu koju je klijent dostavio Banci.

Izuzetnog od prethodnih odredaba, ugovor o osnovnom platnom računu u smislu Zakona o unutrašnjem platnom prometu, Banka može zatvoriti ukoliko na osnovnom platnom računu fizičkog lica nije izvršena nijedna platna transakcija duže od 24 uzastopna mjeseca.

Radnje koje predhode zaključenju ugovora: U pregovaračkoj fazi Korisnik aktivno učestvuje i posredstvom standardnih informacionih listova upoznaje se sa svim bitnim elementima ugovora, kao i sa opštim uslovima. U toku pregovaračkog postupka sva potrebna dodatna obavještenja i obrazloženja može dobiti od radnika Banke kao i nacrt ugovora. Potpisom ugovora Korisnik potvrđuje da su mu prije zaključenja ugovora uručeni i informacioni list i opšti uslovi korištenja platnih kartica i paketa računa, da je upoznat sa sadržajem kao i sa načinom izmjene i saglasan je sa primjenom istih na ugovor. Sastavni dio svakog ugovora su reprezentativni otplatni planovi.

Sigurnost depozita

Osnovne informacije: Depozite u Banci osigurava Agencija za osiguranje depozita Bosne i Hercegovine. Kontakt: Agencija za osiguranje depozita Bosne i Hercegovine, Vase Pelagića 11a, 78 000 Banja Luka, Bosna i Hercegovina, telefon: 00387 051 223 440, faks: 00387 051 223 452, E-pošta: aod@bih.net.ba. Informacije dostupne na web stranici: <https://www.aod.ba>

Maksimalan iznos depozita koji se osigurava je 70.000,00 KM po deponentu po Banci, uključujući pripadajuću kamatu obračunatu do dana nastupanja slučaja osiguranja koji odgovara datumu oduzimanja dozvole za rad banci. Depozit se umanjuje za dugove koje deponent ima prema banci na dan kada joj je oduzeta dozvola za rad.

Osiguranje depozita se ne određuje po osnovu pojedinačnog računa, što znači da se svi depoziti deponenta u jednoj banci zbrajaju a ukupan osiguran iznos je ograničen na 70.000,00 KM. Depoziti jednog deponenta u različitim bankama su odvojeno osigurani svaki do iznosa 70.000,00 KM.

Isplata se vrši u valuti KM. Sva sredstva deponenta u stranoj valuti preračunavaju se u KM na osnovu srednjeg deviznog kursa Centralne banke Bosne i Hercegovine na dan slučaja osiguranja. Zajednički račun je račun koji posjeduju dvije ili više osoba. Ako je deponent vlasnik zajedničkog računa, udio svakog deponenta u zajedničkom računu obračunava se jednako između vlasnika računa, osim ako svi vlasnici računa dostave dokaz o suprotnom. Ukupna isplata po zajedničkom računu ograničena je na iznos 70.000,00 KM po jednom deponentu po banci.

Nadoknada: Sistemom osiguranja depozita u Bosni i Hercegovini upravlja Agencija za osiguranje depozita Bosne i Hercegovine (AODBiH). AODBiH je dužna da sve iznose osiguranih depozita stavi na raspolaganje deponentima, bez neopravdanog kašnjenja, najkasnije u roku od 20 radnih dana od dana oduzimanja dozvole za rad banci.

Kako bi ostvarili pravo na iznos osiguranog depozita deponenti, uz zahtjev za isplatu, moraju dostaviti dokaz zakonskog vlasništva nad depozitom za koji se potražuje nadoknada. Zahtjevi za isplatu potraživanja deponentata zastarijevaju u roku od 5 (pet) godina od dana gubitka dozvole za rad banke.

Sistem osiguranja depozita štiti depozite fizičkih i pravnih lica u banci, osim isključenja u skladu sa članom 6. Zakona o osiguranju depozita u bankama Bosne i Hercegovine. Prikladni depoziti ne uključuju sljedeća sredstva:

- a) depoziti za koje je odlukom suda utvrđeno da su stečeni protivzakonitim radnjama i koji nisu predmet dalje žalbe;
- b) depoziti koji se drže na računima čiji naziv nije transparentan u smislu vlasništva ili nenominovani depoziti;
- c) depoziti koji se čuvaju u sefovima banaka;
- d) depoziti koji se čuvaju u aranžmanu pohranjivanja sa bankom, osim namjenskih depozita;
- e) depoziti drugih domaćih ili stranih banaka koje drže u svoje ime i za svoj račun;
- f) depoziti domaćih ili stranih vladinih organa;
- g) depoziti domaćih i stranih osiguravajućih društava;
- h) depoziti domaćih i stranih organa za kolektivna ulaganja;
- i) depoziti domaćih i stranih penzionih fondova koji se ne smatraju vladinim organima;
- j) depoziti lica u posebnom odnosu sa bankom kako je definisano entitetskim zakonima o bankama;
- k) depoziti kompanija iste grupe kao i banka članica;
- l) depoziti koje je deponent stekao od iste banke članice prema stopama ili drugim finansijskim ustupcima koji su mogli doprinijeti ugrožavanju finansijskog stanja banke članice;
- m) depoziti preduzeća koja mogu biti isključena iz pokrića osiguranja nekim posebnim zakonom ili vladinim uputstvom;
- n) dužničke hartije od vrijednosti koje je izdala banka članica i sve druge obaveze banke članice koje proizlaze iz takvih akceptnih naloga i mjenica;
- o) depoziti mikrokreditnih organizacija.

Ukoliko se desi statusna promjena u banci (npr. spajanje dvije banke), a deponent je imao osigurana sredstva i u jednoj i u drugoj banci biće mu osigurana oba iznosa u roku od 3 (tri) mjeseca od dana kada je statusna promjena obavljena. Nakon isteka roka od tri mjeseca u novoformiranoj banci osiguran je iznos deponentu do 70.000,00 KM.

Druge važne informacije: Sve banke koje imaju dozvolu za rad dobijenu od strane Agencije za bankarstvo Republike Srpske i Agencije za bankarstvo Federacije Bosne i Hercegovine su

obavezno članice sistema osiguranja depozita u Bosni i Hercegovini. Kako bi osigurale depozite banke su dužne da plaćaju premiju osiguranja depozita AODBiH. Premiju osiguranja ne plaćaju deponenti.

Ostale odredbe: Ovi opšti uslovi su sastavni dio Opštih uslova poslovanja Banke i ugovora kojeg zaključe Banka i klijent, kao i sve naknadne promjene opštih uslova, koji su dostupni u poslovnim prostorijama i na web stranici Banke.